

ORD CUSCHINA FMR

Cun novas forzas a partir da fanadur

Dapi l’entschatta da quest mais ha la FMR survegnì sustegn. Uschia turna Manuel Pelican da Lumbrein per dus mais en redacziun per sustegnair la squadra surtut tar las lavurs da producziun da las gasettas. Il giuven Lumnezian aveva gia fatg quest enviern in praticum redacziunal tar la FMR.

A partir da quest mais vegn Rolf Giger da Cuira a sustegnair durant in mez onn la FMR tar l’impaginaziun da La Quotidiana. El vegn a remplazzar l’impaginatura Daniela Derungs ch’ha congedi. Rolf Giger è bain enconuschent en il Grischun sco versà caricaturist per pliras gasettas e revistas. Dacurt ha la FMR purtretà l’illustratur en in artitgel, perquai ch’el ha avert questa primavaira amez la citad veglia da Cuira in local d’atelier e d’exposiziun. Damai, cordial bainvegni a Manuel ed a Rolf!

Per la redacziun FMR,
David Truttmann, schefredactur

CUIRA

Festa federala da tir tira
ina bilantscha positiva

En il Grischun è suenter quatter emnas ida a fin questa dumen-gia la Festa federala da tir (guarda resultats sin questa pagina). Var 35 000 tiraduras e tiradurs èn vegnids a Cuira. Plinavant ha la festa carmalà var 100 000 visitaders.

Il president dal comitè d’organisaziun Martin Candinas tira ina bilantscha positiva: «Jau sun enorm cuntent che nus n’avain gi na-gins accidents, nagins problems pli gronds e che nus avain pudì realisar la festa per cuntentientscha da la gronda part da las tiradu-ras e dals tiradurs.» El è persvas che tant la citad da Cuira sco er ils lieus che han gi stans da sajettar hajan profità da questa festa. Per pudair realisar l’occorrenza da tir en la chapitala grischuna èn var 5000 gidantras e gidanters stads en acziun. (rtr/fmr)

VICOSOPRANO

Polizia ha franà in pirat da la via

In automobilist è vegnì traplà a Vicosoprano suenter esser charrà 63 km/h memia spert. Sco che la Polizia chantunala ha scrit en ina comunicaziun haja ina patruglia franà l’Ollandais ed prendì da-vent sia patente da l’auto. L’um da 54 onns era da viadi enturn las 14.15 da la Bregaglia en direcziun Silvaplauna. Ina mesiraziun da sveltezza ha inditgà 143 km/h – tar ina limita dad 80 km/h. L’um è vegnì denunzià tar la procura publica dal Grischun. (cdm/fmr)

STAMPA

Motociclist blessà mez grev

La sonda passada ha in motociclist chaschunà sez in accident a Stampa en Val Bregaglia. El è sa blessà mez grev. Il motociclist da 18 onns charrava curt avant las 05.00 la damaun sin la Strada Prin-cipale a Stampa. Là è el collidà «cun plirs objects», sco che la Poli-zia chantunala ha scrit en ina comunicaziun. Suenter l’emprim agid da vart da persunal da la guardia da cunfin, in team dal salva-ment Spino ed in medi d’urgenza, è il giuven da 18 onns vegnì sgulà cun la Rega a Cuira en l’Ospital chantunal. (cdm/rtr/fmr)

FANAS

In vehichel agricul ha cumenzà ad arder

A Fanas è ars venderdi suentermezdi in vehichel agricul. Il mani-schunz è restà senza blessuras. Curt avant las 16.30 aveva in pur-emprendist l’intenziun da far lavurs da far fain cun ses vehi-chel. Latiers hai cumenzà ad arder sut il viertgel dal motor. Il ma-nischunz è sa salvà or da la maschina ed ha empruvà da stizzar il feu cun dus pitschens stizzafieus.

Per stizzar complettament in feu han dentant stui vegnir en ac-ziun ils pumpiers dal Partenz Anterior cun 16 persunas. (cdm/fmr)



Il vehichel ch’è ars venderdi a Fanas. FOTO POLIZIA CHANTUNALA



Il chantun Grischun aveva stui etabli quest enviern in grond dispositiv per reglar il traffic durant ils gieus olimpics, sco p.ex. cun parcadis a Zernez. Bliers visitaders da las occurrenzas enta Livigno n’han dentat betg fatg diever da l’auto, mabain dals meds publics. Uschia ch’ils parcadis èn restads per part vids.

KEYSTONE/MAYK WENDT

GIEUS OLIMPICS

La Lombardia empermetta da pajar

Da reglar ed organisar il traffic durant ils gieus olimpics en l’Italia il favrer passà, quai ha custà al chantun Grischun 3,48 milliuns francs. Il Chantun aveva perquai mess a quint a l’Italia 2,6 milliuns. Ditg n’hai betg dà ina garanzia en scrit da vart taliana, sch’ella sa participescha als custs u betg. Ussa datti quella empermischun en scrit.

KEYSTONE-SDA/FMR RG

Ils Gieus olimpics Milano-Cortina 2026 èn gia dapi in mez onn istorgia. Ma la dumonda tgi che paja ils custs da traffic tranter il Grischun e l’Italia, spezialmain tranter l’Engiadina e Li-vigno, è stada ditg averta. Ussa datti apparen-tamain moviment.

Ina garanzia en scrit

Sin basa dals ultims discours intensivs e cun su-tegn dal cusseglier federal Ignazio Cassis e da l’ambassadur svizzer a Roma, Roberto Balza-retti, ha il president da la regiun Lombardia, Attilio Fontana, garantì en scrit a la regenza grischuna che sia regiun sa participeschia als custs. Quai ha il chantun Grischun communi-tgà venderdi passà.

Ils responsabels da la regiun Lombardia ave-van bain gia dà a bucca in consentiment avant ils gieus olimpics da surpigliar ina part dals custs dal concept da traffic. Malgrà plirs

contacts dal Grischun n’è però mai vegnì pajà quel import.

Quants daners exact che vegnan ussa trans-ferids si da la Lombardia en il Grischun n’è anc adina betg cler, malgrà l’empermischun en scrit ch’è vegnida fatga ussa. Quai ha il presi-dent da la regenza grischuna Martin Bühler ex-plitgà envers Keystone-SDA: «Els èn da l’opi-niun che noss quint saja memia aut. Nus spe-tgain lur propositas ed essan lura pronts per tractativas», ha ditg Martin Bühler.

«Nagin na vul tensiuns»

Igl è perquai pussaivel ch’il Grischun surve-gnia la fin dals quints damain che 2,6 milliuns francs. Cunquai che la conferma en scrit è ar-rivada ussa, less il Grischun dar temp a la re-giun Lombardia da pajar il quint avert fin l’auter onn.

Sch’i na vegnia betg tegnì pled e betg pajà, lura sa resalva la regenza grischuna il dretg da squintar l’import cun pajaments pendants a

l’Italia. Concret vuless quai dir tenor il presi-dent da la regenza grischuna Martin Bühler: «Sche l’import na vegn betg pajà fin l’auter onn, lura essan nus pronts da bloccar las resi-tuziuns da cunfinaris.» Martin Bühler ha den-tant accentuà che quai saja ina mesira ch’ins veglia be prender sco ultima ratio. «Nus vu-lain cuntinuar la via da la diplomazia e da la cooperaziun. Nagin na vul tensiuns.»

Garantir circulaziun libra durant stagiun

Ils 25avels gieus olimpics d’enviern èn vegnids organisads dals 6 fin ils 22 da favrer 2026 en l’Italia dal Nord, tranter auter er enta Livigno, al cunfin cun la Svizra. Pervi da la vischinanza geografica è il chantun Grischun stà pertutgà directamain dals effects da quest grond eveni-ment internaziunal. Per garantir la circulaziun libra dal traffic durant la stagiun auta dals lieus da turissem d’enviern en il Grischun aveva il Chantun stui reglar ed organisar il traffic cun in concept spezial.

FESTA FEDERALA DA TIR

In retg grischuns – ed ina medaglia da bronz

La 59avla Festa da tir federala 2026 a Cuira e conturn è a fin. Ier ha gi lieu la concorrenza per eruir ils retgs u las reginas da tir e quai en tschintg categorias. Ed il Grischun ha in nov retg-tiradur: Georg Maurer da Favugn.

GION NUTEGN STGIER/FMR RG

In mais ha cuzzà la Festa da tir federala en il Gri-schun, cun Cuira sco center principal. Sajettà è vegnì decentral e quai sin ulteriurs 19 stands. 36 000 participants e participantas han tratg in dals 147 stitgs pussaivels sin las distanzas da 10, 25, 50 e 300 meters. Ida a fin è l’occorrenza nazi-unala da tir questa fin d’emna cun la culmi-naziun, cun il tir per eruir il retg-tiradur ubain la regina-tiradura e quai en trais crategorias sin la distanza da 300 meters, cun la pistola sin la distanza da 25 meter e cun l’arma da caliber pi-tschen sin la distanza da 50 meters.

Ils victurs

Sin la distanza da 300 meters han 16 tiradurs grischuns tratg la qualificaziun per vegnir en il final grond cun mintgamai ils org megliers da las treis categorias arma da sport, arma 57/03 ed arma da militar 90.



Georg Maurer da Favugn procura per in punct culminant grischun a la Festa federala da tir. El è retg-tiradur 2026. FOTO GION NUTEGN STGIER

Cun la pistola èn trais tiradurs dal Grischun stads en concorrenza e sin la distanza arma 50 meters eran quai trais tiraduras ed in tiradur. Suenter ils finals plain tensiun èn lura vers las 17.30 stads eruids il retgs-tiradurs. Sin la distan-za da 300 meters arma da sport è quai perfin in Grischun: Georg Maurer da Favugn ha – cun in avantatg da 5,9 puncts – declassà la concorrenza en il final (cat. A). Il grond victur da la categoria D arma 57/03 è Thomas Meier da Rüdlingen (SH). Er en questa categoria hai dà ina medaglia grischuna: Andrea Stiffler da Tavau ha gudagnà la medaglia da bronz. La regina-tiradura da la ca-tegoria E arma da militar è daventada Erika Brei-tenmoser da Wiesen (SG).

Tar la categoria pistola 25 meters sa numna il retg-tiradur Adrian Schaub da Zuzgen (AG). Il matador local Elmar Fallet da Müstair è ve-gnì quart. Ed en la categoria arma 50 meters dastga sa legrar Chiara Leoni da Balsthal (SO) da quel titel.